

दिनांक 06.09.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- केन्द्रीय मंत्री अश्विनी वैष्णव जीएसटी 2.0 ऊं जी.डी.पी. मांय करीब 20 लाख करोड़ रुपया री बधोतरी री आस जताई।
- प्रदेश रा 12 रोड़वेज बस डिपो ने 160 ब्लू लाइन एक्सप्रेस बसां मिली— जयपुर ऊं कैंचीधाम सारू आरामदायक बसां चलाई ज्यो।
- प्रदेश रा लंकाऊ हलकां मांय आवता चौबीस घंटा मांय घणी ज़ोरदार बिरखा रो रेड अलर्ट जारी करी ज्यो।
- अनंत चौदस रे मौके आस्था अर भक्तिभाव सागे गणपति विसर्जन कर्यो जा रह्यो है।

सूचना अर प्रसारण मंत्री अश्विनी वैष्णव कह्यो है के जीएसटी सुधारां ऊं मझला दर्जा रा पिरवारां ने घणी साता मिलेला। वे आज नई दिल्ली मांय खबरनवीसां सागे बातचीत करता थकां कह्यो के इण ऊं देश रा सकल घरेलू उत्पाद—जी.डी.पी. मांय करीब 20 लाख करोड़ रुपया री बधोतरी व्हेवण री आस है।

केन्द्रीय पर्यटन मंत्री गजेन्द्र सिंह शेखावत ई जोधपुर मांय खबरनवीसां सागे बातचीत करता थकां जीएसटी सुधारां ने माली व्यवस्था ने तेज़ करण वाळा बताया। वे कह्यो के इण ऊं सैर-सपाटा रा हलका ने ई फायदो व्हेला।

मुख्यमंत्री भजनलाल शर्मा री मौजूदगी मांय आज वित्त विभाग अर पंजाब नेशनल बैंक बीचे एक करार माथे सही करीजी। जयपुर मांय मुख्यमंत्री रा रेहवास माथे व्ह्या ई करार रा तैत राज्य सरकार री विकास री न्यारी-न्यारी योजनावां सारू पीएनबी री ओर ऊं माली मदद दी जावेला। श्री शर्मा आज जयपुर मांय अमर जवान ज्योति ऊं रोड़वेज री दो सुपर लक्ज़री अर 160 ब्लू लाइन बसां ने हरी झण्डी बता र रवाना कीनी। सुपर लक्ज़री बसां जयपुर ऊं उत्तराखंड मांय कैंचीधाम बीचे चलायी जावेला। इण ऊं नीम करौली धाम जावण वाळां ने सहूलियत व्हेवण सागे धार्मिक पर्यटन ने ई बधावो मिलेला। ब्लू लाइन एक्सप्रेस बसां जयपुर रा चार डिपो अर हिण्डौन, दौसा, अजमेर, कोटपूतली, धौलपुर, सवाईमाधोपुर अर भीलवाड़ा रा बस डिपो ने दीरीजी है। रोड़वेज री नुवी बसां चालण ऊं आवण जावण रा बधता दबाव ने कम करण मांय मदद मिलेला।

मुख्यमंत्री आज जयपुर मांय व्ह्या गौ महाकुंभ मांय ई शिरकत कीनी। विद्याधर नगर स्टेडियम मांय राख्यी ज्यो ई सम्मेलण मांय मुख्यमंत्री गौवंश ने बधावण अर बचावण सारू राज्य सरकार री कोशिशों री जाणकारी दीनी। मुख्यमंत्री कह्यो के गायां ने बधावो देवणो देश री संस्कृति ऊं जुड़्यो है। वे कह्यो के राज्य सरकार बैलां ऊं खेती करण वाळां ने सब्सिडी दे रही है।

प्रदेश रा घणी बिरखा वाळा हलकां रो ज़िलां रा प्रभारी मंत्री अर सचिव दौरा कर र हालात रो जायजो ले रहया है। ई सागे ई संबंधित अहलकारां सागे मीटिंग कर र जनता ने बेगी साता देवण सारु हुकम दिया ज्या है। सलूमबर मांय व्हे रही लगातार बिरखा रे कारण भर्या पाणी अर इण ऊं उपजा हालात रो जायजो लेवण सारु ज़िला रा प्रभारी मंत्री हेमंत मीणा वठे रो दौरा कीनो। वे सेमारी हलका मांय किसानां ऊं फसल खराबा री जाणकारी लीनी। श्री मीणा जनता ऊं तेज़ बहाव वाळा हलका ऊं दूर रेहवण री अपील कीनी है। करौली मांय प्रभारी मंत्री जवाहर सिंह बेढम अर प्रभारी सचिव अनुपमा जोरवाल घणी बिरखा रे कारण उपजा हालात री जाणकारी ले र जरूरतमंद लोगां ने तुरत मदद देवण रा हुकम दीना। संसदीय कार्य मंत्री जोगाराम पटेल अर जोधपुर रा ज़िला प्रभारी मंत्री मदन दिलावर आज ज़िला रा लूणी मांय घणी बिरखा रे कारण व्ह्या नुकसाण रो जायजो लेवण सारु अहलकारां सागे मीटिंग कीनी। मीटिंग मांय वे कृषि अर पंचायतीराज विभाग रा अहलकारां सागे हलका मांय व्हसा फसल खराबा अर जनता री परेशानियां री जाणकारी लीनी। वे टूटी स्कूलां, अस्पतालां अर आंगनबाड़ी केन्द्रां री मरम्मत रा प्रस्ताव बेगा तैयार करण रा हुकम दीना। श्री पटेल फसल खराबा री गिरदावरी तुरत अर साफगोई सागे करण रा हुकम दीना। मीटिंग मांय श्री दिलावर कह्यो के गिरदावरी री प्रक्रिया बेगी पूरी कर र जनता ने साता देवण माथे सरकार रो खास ध्यान है। डीग, सवाईमाधोपुर, करौली अर हनुमानगढ़ मांय ई ज़िला रा प्रभारी सचिव दौरा कर र राहत रा कामां रो जायजो लीनो।

राज्य रा लंकाऊ हलकां मांय आवता चौबीस घंटा ताई घणो जोरदार मेह व्हेवण रो रेड अलर्ट जारी करी ज्यो है। उदयपुर अर जोधपुर संभाग रा कुछ हलकां मांय कठे-कठे भारी ऊं घणी भारी बिरखा रा आसार है। ई दौरान अजमेर, बीकानेर, कोटा, जयपुर अर भरतपुर संभाग रा कुछ हलका मांय मझला ऊं तेज़ दर्जा री बरसात री संभावना है। 8 सितम्बर ऊं जोधपुर संभाग रे अलावा राज्य रा घणखर हलकां मांय बिरखा रो जोर कम पड़बा रा आसार है। ई बीचे राज्य रा न्यारा-न्यारा हलका मांय व्हे रही बिरखा ऊं नदी-नाळा उफण रहया है। सलूमबर मांय व्ही मूसलाधार बरसात ऊं ज़िला री झामरी अर टीड़ी नदियां मांय घणो पाणी आ रह्यो है। गोमती अर सरणी नदियां मांय ई पाणी हलोळा ले रह्यो है अर केई नीचला हलकां मांय हालात मुश्किल व्हे गया है। म्हाणा डूंगरपुर खबरनवीस बतायो के ज़िला मांय भारी बरसात रा रेड अलर्ट ने ध्यान राखता थकां जनता ऊं सावचेत रहेहवण री अपील करी जा रही है। बांसवाड़ा मांय संवारे ऊं ई कदे हल्की तो कदे तेज़ बारिश व्हे रही है। माही बजाज सागर बंधा रा 8 दरुजा खोल र बत्तो पाणी निकाळ्यो जा रह्यो है। घणो पाणी आवण ऊं बेणेश्वर धाम रे चार ई मेर पाणी भर ग्यो है।

उदयपुर मांय लगातार व्हे रही बारिश ऊं केई कॉलोनियां मांय पाणी भर ग्यो है अर आवण-जावण माथे असर पड़्यो है। इण ने देखता थकां प्रशासन जनता ऊं घरां ऊं बाहर नी निकळबा री अपील कीनी है। बालोतरा मांय दोपहरां री बगत झमाझम मेह बरस्यो। श्रीगंगानगर मांय संवारे ऊं ई तेज़ गर्मी अर उमस पाछे दोपहरां री बगत करीब दो घंटा ताई तेज़ बारिश व्ही। जालौर रा आहोर समेत केई ठोडां झमाझम बिरखा व्ही। जवाई नदी रे किनारे बस्योड़ा लोगां ऊं सुरक्षित ठोडां जावण री अपील करी जा रही है। सिरोही मांय ई रुक-रुक र बारिश व्हे रही है। भीलवाड़ा मांय लारली रात ऊं ई रिमझिम बारिश व्हे रही है। म्हाणा खबरनवीस बतायो के लगातार बारिश ने ध्यान राखता थकां बनास नदी कने बल्लियां लगा र लोगां री आवाजाही रोक दीरीजी है।

चित्तौड़गढ़ मांय लगातार व्हे रही बारिश ऊं ज़िला रा सब ऊं मोटा गंभीरी बंधा रा दो दरुजा खोल र बत्तो पाणी निकाळ्यो जा रह्यो है। कपासन हलका मांय व्ही जोरदार बिरखा ऊं दोवनी रो नाळो उफण रह्यो है अर गुलाब सागर ऊं ई बत्तो पाणी निकळबा लाग्यो है।

सवाईमाधोपुर ज़िला रा बामनवास, भांवरा, मित्रपुरा, चौथ का बरवाड़ा, खंडार अर बाँली ऊं ई तेज बरसात रा समाचार मिल्या है। पाली ज़िला रा जवाई बंधा ऊं ई बत्तो पाणी निकाळ्यो जा रह्यो है। सिरोही ज़िला मांय व्हे रही तेज बारिश रे कारण डूंगरी रा जूना मातर माता मिन्दर मांय 200 ऊं बत्ता जातरु फंस गया। जाणकारी मिलता ई प्रशासन अर एसडीआरएफ री टीमां दूजा गेलां ऊं खास साज-ओ-सामान री मदद ऊं सगळा ने हिफाजत सागे नीचे उतार्या। ई बीचे बारां ज़िला रा शाहबाद हलका रा खांडा सहरोल गांव मांय गणपति विसर्जन रे दौरान बीजळी पड़ जावण ऊं 6 जणा झुलस गया। आं लोगां ने अस्पताल मांय भर्ती करायी ज्या है, जदके घणा झुलस्या एक जणा ने बारां रैफर करी ज्यो है।

अनंत चौदस आज रीत मुजब मनायी जा रही है। ई मौके गणपति मूतियां विसर्जित करण सारु संवारे ऊं ई तळावां-बावड़ियां माथे मोटी तादाद जातरु पूग्या। अनंत चौदस रे मौके विसर्जन यात्रावां ई निकाळी जा रही है, ज्यां मांय भगत नाचता-गाता गणपति रा जयकारा लगा रह्या है। लोग पाणी रा कुदरती स्त्रोतां सागे घरां अर कृत्रिम जल स्त्रोतां मांय ई गणपति विसर्जन कर रह्या है। विसर्जन री ठोड़ां जनता री हिफाजत सारु पुलिस, एनडीआरएफ अर एसडीआरएफ री टीमां ई तैनात करीजी है। चित्तौड़गढ़, पाली, सलूम्बर, सवाईमाधोपुर, सिरोही, भरतपुर अर जोधपुर समेत न्यारी-न्यारी ठोड़ां बारिश री फुहारां बीचे लोग भक्ति भाव सागे गणपति विसर्जन कर रह्या है। कोटा मांय किशोर सागर तळाव अर भीतरिया कुंड माथे गणपति बप्पा ने भावभीनी विदाई देवण सारु मोटी तादाद मांय जातरु पूग्या। लोकसभा अध्यक्ष ओम बिरला कोटा मांय शोभा यात्रा ने रवाना कीनी। अनंत चौदस महोत्सव मांय श्री बिरला इण ने सगळां री सिरधा रो पर्व बतायो।
